



MINISTRIA E KULTURËS	
Nr. 9510	Prot.
Date 24.12.2018	8

REPUBLIKA E SHQIPERISË
KËSHILLI I MINISTRAVE

VENDIM

Nr. 788, datë 26.12.2018

PËR

PËRBËRJEN, KOMPETENCAT, MËNYRËN E FUNKSIONIMIT E TË SHPËRLIMIT TË ANËTARËVE TË KËSHILLIT KOMBËTAR TË MUZEVE

Në mbështetje të nenit 100 të Kushtetutës dhe të neneve 37, pika 2, e 197, pika 4, të ligjit nr.27/2018, "Për trashëgiminë kulturore dhe muzetë", me propozimin e ministrit të Kulturës, Këshilli i Ministrave

VENDOSI:

I. QËLLIMI

Ky vendim ka për qëllim përcaktimin e përbërjes, të kompetencave, mënyrës së funksionimit e të shpërblirnit të anëtarëve të Këshillit Kombëtar të Muzeve, në vijim KKM.

II. PËRBËRJA E KËSHILLIT KOMBËTAR TË MUZEVE

1. Këshilli Kombëtar i Muzeve është organi kolegjal vendimmarrës në fushën e muzeve, që kryesohet nga ministri përgjegjës për trashëgiminë kulturore dhe përbëhet nga 11 anëtarë. Anëtarët e KKM-së përcaktohen me urdhër të ministrit përgjegjës për trashëgiminë kulturore.
2. Këshilli Kombëtar i Muzeve ka në përbërje të tij përfaqësues të institucioneve shtetërore të specializuara dhe specialistë në fushën e trashëgimisë kulturore materiale e muzeore brenda dhe jashtë sistemit të ministrisë përgjegjëse për trashëgiminë kulturore.
3. KKM-ja përbëhet nga:
 - a) Ministri përgjegjës për trashëgiminë kulturore;

- b) Drejtori i Përgjithshëm i Politikave dhe Zhvillimit të Kulturës pranë ministrisë përgjegjëse për trashëgiminë kulturore;
 - c) Drejtori i Zhvillimit të Programeve të Kulturës pranë ministrisë përgjegjëse për trashëgiminë kulturore;
 - ç) Drejtori i Muzeut Historik Kombëtar;
 - d) Drejtori i Institutit Kombëtar të Trashëgimisë Kulturore;
 - dh) Drejtori i Muzeut Kombëtar të Arteve të Bukura;
 - e) Drejtori i Institutit Kombëtar të Regjistrimit të Pasurive Kulturore;
 - ë) Përfaqësuesi i Akademisë së Studimeve Albanologjike;
 - f) Përfaqësuesi i Akademisë së Shkencave;
 - g) Përfaqësuesi i Fakultetit të Historisë dhe Filologjisë, Universiteti i Tiranës;
 - gj) Një personalitet i shquar në fushën e muzeologjisë.
4. Drejtori i Muzeut Historik Kombëtar ushtron edhe funksionin e sekretarit të KKM-së.
5. Mandati i anëtarit të KKM-së jashtë sistemit të ministrisë përgjegjëse për trashëgiminë kulturore është 2 vjet, me të drejtë riemërimi. Anëtari qëndron në detyrë dhe përmbush funksionet deri në emërimin e anëtarit të ri.
6. Anëtari i KKM-së mund të japë dorëheqjen në çdo kohë, duke njoftuar me shkrim kryetarin. Anëtari i dorëhequr është i detyruar të përmbushë të gjitha detyrat e lëna deri në miratimin e urdhrit të ndryshimit.
7. Anëtarët e KKM-së duhet të deklarojnë çdo rast të konfliktit të mundshëm të interesit, në përputhje me ligjin nr.9367, datë 7.4.2005, “Për parandalimin e konfliktit të interesave në ushtrimin e funksioneve publike”, të ndryshuar.

III. KOMPETENCAT E KËSHILLIT KOMBËTAR TË MUZEVE

Këshilli Kombëtar i Muzeve, krahas kompetencave të përcaktuara në nenin 197, të ligjit nr.27/2018, “Për trashëgiminë kulturore dhe muzetë”, ka edhe këto kompetenca:

- a) Miraton kriterë për emërimin e drejtorëve të muzeve qendorë, vendorë dhe autonomë;
- b) Miraton masat për ruajtjen, mbrojtjen, mirëmbajtjen, administrimin, tjetërsimin dhe qarkullimin e objekteve muzeore e të koleksioneve muzeore;

- c) Përcakton rregullat dhe procedurat për krijimin, plotësimin e përditësimin e Katalogut të Fondit Muzeor Kombëtar;
- ç) Shqyrton dhe miraton kërkesën për pasurim të fondeve muzeore, të paraqitur nga ana e muzeve publikë e privatë, duke konfirmuar edhe vlerën financiare të koleksioneve në kohën e blerjes së tyre, pas marrjes së mendimit nga ana e Institutit Kombëtar të Regjistrimit të Pasurive Kulturore;
- d) Miraton shkëmbimin e fondeve muzeore ndërmjet muzeve.

IV. MËNYRA E FUNKSIONIMIT E KËSHILLIT KOMBËTAR TË MUZEVE

1. Këshilli Kombëtar i Muzeve drejtohet dhe thirret nga kryetari. KKM-ja mblidhet jo më shumë se 4 herë në vit, përveç rasteve përjashtimore, të thirrura nga kryetari i saj.
2. Kryetari cakton datën dhe orën e mbledhjeve të radhës. Anëtarët e KKM-së njoftohen 5 ditë para mbledhjes për çdo ndryshim në datën dhe orën e mbledhjes. Njoftimi për thirrjen e një mbledhjeje duhet të tregojë në mënyrë të qartë e të detajuar çështjet për të cilat do të diskutohet.
3. Kryetari është i detyruar të thërrasë një mbledhje kur kjo kërkohet me shkrim, nga, të paktën, $\frac{1}{3}$ e anëtarëve me të drejtë vote, duke përcaktuar çështjet për të cilat thirret kjo mbledhje.
4. Njoftimet për thirrjen e mbledhjeve bëhen brenda 15 ditëve, përpara datës kur do të zhvillohet mbledhja.
5. Kryetari vendos për rendin e ditës së çdo mbledhjeje. Rendi i ditës duhet të përfshijë çështjet që i janë propozuar atij nga anëtarët e KKM-së me të drejtë vote dhe që janë në kompetencë të këtij organi. Kërkesa për të përfshirë një çështje në rendin e ditës duhet të bëhet me shkrim, të paktën, 5 ditë përpara datës së vendosur për mbledhjen. Rendi i ditës duhet t'u shpërndahet të gjithë anëtarëve, të paktën, 48 orë përpara datës dhe orës së mbledhjes. Bashkëngjitur rendit të ditës, anëtarëve u shpërndahen edhe materialet e dokumentacionet që do të diskutohen në mbledhje.
6. Mbledhjet e KKM-së zhvillohen gjithmonë në prani të kryetarit dhe janë të vlefshme kur në to marrin pjesë $50 + 1$ për qind e anëtarëve.
7. Në rast të mosplotësimit të shumicës së kërkuar, sipas pikës 6, të këtij kreu, kryetari e thërret mbledhjen pasardhëse jo më vonë se 24 orë nga data e anulimit të mbledhjes.

8. Vendimet merren me shumicën e thjeshtë të votave të anëtarëve të pranishëm.
9. Vendimet merren me votim të hapur.
10. Kryetari i KKM-së voton i fundit. Në rastet kur votat ndahen në mënyrë të barabartë, vota e kryetarit është përcaktuese.
11. Vendimet e KKM-së nënshkruhen nga kryetari dhe siglohen nga sekretari.
12. Sekretaria teknike e KKM-së përbëhet nga përfaqësues të Muzeut Historik Kombëtar dhe kryen detyrat, si më poshtë vijon:
 - a) Regjistron kërkesat e paraqitura;
 - b) Përgatit ose bashkërendon hartimin e materialeve për çështjet që do të diskutohen në mbledhjen e këshillit;
 - c) Përgatit mbledhjet;
 - ç) Kryen njoftimet përkatëse dhe shpërndarjen e materialeve;
 - d) Mban procesverbalin e mbledhjes, në të cilin bëhet përmbledhja e të gjitha çështjeve që u diskutuan në mbledhje, me datën dhe vendin e mbledhjes, anëtarët që morën pjesë, vendimet që u morën si dhe formën dhe rezultatin e votimeve;
 - dh) Mban protokollin;
 - e) Harton vendimin e KKM-së.
13. Përfaqësuesit e Këshillit Ndërkombëtar të Muzeve (ICOM-Shqipëri), përfaqësuesit e Këshillit Ndërkombëtar në Monumentet dhe Sitet (ICOMOS-Shqipëri) dhe përfaqësuesit e specialistët në fushën e muzeologjisë ndjekin mbledhjet e KKM-së pa të drejtë vote.

V. SHPËRBLIMI I ANËTARËVE TË KËSHILLIT KOMBËTAR TË MUZEVE

Shpërblimi për pjesëmarrje në mbledhje, për çdo anëtar, bëhet sipas përcaktimeve të bëra në vendimin normativ të masës së shpërblimit të këshillave, bordeve ose komisioneve të njësive të qeverisjes qendrore.

VI. DISPOZITA TË FUNDIT

1. Ngarkohen Akademia e Studimeve Albanologjike, Akademia e Shkencave dhe Fakulteti i Historisë dhe Filologjisë, Universiteti i Tiranës, t'i

propozojnë ministrit përgjiegjës pér trashëgiminë kulturore anëtarët e tyre përfaqësues në Këshillin Kombëtar të Muzeve.

2. Ngarkohet ministri i Kulturës, që, brenda 10 ditëve, nga hyrja në fuqi e këtij vendimi, të nxjerrë urdhrin nominal pér përbërjen e anëtarëve të KKM-së.
3. Ngarkohen ministri i Kulturës dhe Këshilli Kombëtar i Muzeve pér zbatimin e këtij vendimi.

Ky vendim hyn në fuqi pas botimit në "Fletoren zyrtare".

— — — KRYE MINISTR L

EDI RAMA

MINISTRI I KULTURËS

MIRELA KUMBAKO FURXHI